



Adresa: **Ul. Hamdije Čemerlića 39a**
71000 Sarajevo
<http://www.voda.ba>

tel. +387 33 726 400
fax. +387 33 726 423
e – mail: info@voda.ba

Broj: **UP-I/21-3-40-304-6/21**
Datum: **24.09.2021.**

«Agencija za vodno područje rijeke Save» Sarajevo rješavajući po zahtjevu pravnog lica «MODERNIZACIJA» d.o.o. Gradačac za donošenje Rješenja o vodnoj dozvoli za ispuštanje oborinskih onečišćenih i tehnoloških otpadnih voda u prirodni recipijent sa lokacije objekta za otkup i skladištenje sekundarnih sirovina u Lukavcu, na osnovu člana 109. stav (1) tačka 2. Zakona o vodama («Službene novine Federacije BiH», broj 70/06) i člana 200. stav (1) Zakona o upravnom postupku («Službene novine Federacije BiH», broj 2/98 i 48/99), donosi

R J E Š E N J E **o vodnoj dozvoli**

1. Pravnom licu, «MODERNIZACIJA» d.o.o. Gradačac daje se vodna dozvola za ispuštanje oborinskih onečišćenih i tehnoloških otpadnih voda u prirodni recipijent sa lokacije objekta za otkup i skladištenje sekundarnih sirovina u Lukavcu, ulica Tuzlanskog odreda 113, izgrađenog na zemljištu označenom kao k.č. broj 2813/1 K.O. Lukavac, općina Lukavac.
2. Vodna dozvola se daje na osnovu dostavljene dokumentacije, utvrđenog činjeničnog stanja tokom uviđaja izvršenog na lokaciji objekta i uz slijedeće uslove:
 - 2.1. Da se upotreba i korištenje predmetnog objekta vrši u skladu sa njegovom prirodom i namjenom te u skladu sa dostavljenom dokumentacijom i uslovima iz ove vodne dozvole.
 - 2.2. Da se u roku važenja ovog Rješenja izradi projektna dokumentacija za vanjske hidroinstalacije i vanjsko uređenje – izvedeno stanje za predmetni objekat. Projektna dokumentacija treba biti urađena od strane pravnog lica koje ima ovlaštenje (lista «A») pribavljeno od strane Federalnog ministarstva poljoprivrede, vodoprivrede i šumarstva.
 - 2.3. Da se u toku važenja ovog Rješenja ishoduje okolinska dozvola za predmetni objekat odnosno aktivnost, te odobrenje za upotrebu predmetnog objekta.
 - 2.4. Da se rabljena i nova ulja skladište u odgovarajućim posudama u namjenskoj prostoriji i na odgovarajući način, u cilju sprječavanja nekontrolisanog rasipanja sadržaja na okolni teren.
 - 2.5. Da korisnik predmetnog objekta, za vrijeme trajanja ove dozvole, obezbjeđuje da se onečišćene vode sa saobraćajnih, radnih i manipulativnih površina, nesmetano sakupljaju i odvoze do objekta predviđenog za tretman oborinskih onečišćenih voda (separator masti i ulja), a zatim ovako tretirane vode ispuštaju u gradsku kanalizaciju kojom upravlja JP «RAD» d.o.o. Lukavac.
 - 2.6. Objekte čija je svrha odvođenje i prečišćavanje oborinskih onečišćenih voda (separator masti i ulja, slivnici i rešetke, kanalizaciona mreža) treba redovno održavati i koristiti na način koji će obezbijediti njihovu potpunu ispravnost i funkcionalnost. Čišćenje i pražnjenje uređaja za tretman otpadnih voda, odnosno separatora masti i ulja može vršiti isključivo firma ovlaštena za tu vrstu djelatnosti, prema posebnom ugovoru. Korisnik je obavezan da redovno vodi dnevnik o pražnjenju i odvozu izdvojenog taloga iz separatora.
 - 2.7. Prečišćene otpadne vode moraju ostati u maksimalno dopuštenim granicama definiranim članom 14. Uredbe o uslovima ispuštanja otpadnih voda u okoliš i sisteme javne kanalizacije («Službene novine Federacije BiH», broj 26/20 i 96/20).
 - 2.8. Korisnik objekta je dužan, putem laboratorije ovlaštene od strane Federalnog ministarstva poljoprivrede, vodoprivrede i šumarstva, vršiti redovna ispitivanja kvaliteta otpadnih voda, uzimanjem uzorka efluenta iz okna za monitoring u skladu sa Uredbom o uslovima ispuštanja otpadnih voda u okoliš i sisteme javne kanalizacije. Učestalost i način ispitivanja vršiti u skladu sa članom 20. Uredbe o uslovima ispuštanja otpadnih voda u okoliš i sisteme javne kanalizacije. Rezultate analiza dostaviti ovoj Agenciji.

- Izvještaje o ispitivanju i ocjeni kvaliteta otpadnih voda može uraditi isključivo laboratorija ovlaštena od strane Federalnog ministarstva poljoprivrede, vodoprivrede i šumarstva po osnovu člana 64. stav (3) Zakona o vodama i Pravilnika o uslovima koje moraju ispunjavati referentne odnosno ovlaštene laboratorije za ispitivanje voda, sadržaj i način davanja ovlasti («Službene novine Federacije BiH», broj 14/10, 14/13, 26/14, 23/17 i 41/20).
- 2.9. Talog iz separatora, kao i ostali opasni i neopasni otpad, se ne smije ni privremeno odlagati na česticu „vodno dobro“, odnosno u vodotoke i na njegove obale.
 - 2.10. Da se u skladu sa propisima iz oblasti zaštite okoliša vrši bezbjedno skladištenje i postupanje sa opasnim materijama i otpadnom nastalim da predmetnom lokalitetu (adekvatnim mjerama onemogućiti bilo kakvo istjecanje i rasipanje opasnih i štetnih materija u tlo i vode). Osigurati priručna sredstva za brzu intervenciju u slučaju nekontrolisanog rasipanja opasnog otpada.
3. Vlasnik, odnosno korisnik objekta je obavezan voditi propisne evidencije, te nadležnim organima dostavljati propisane obrasce (Obrazac EBS) u skladu sa Zakonom o vodama i Pravilnikom o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte vodne naknade i posebnih vodnih naknada («Službene novine Federacije BiH», broj 92/07, 46/09, 79/11, 88/12 i 03/16), Prilog 1. Poglavlje V – Određivanje koeficijenata zagađenja za zagađivače voda kod kojih se ne vrše direktna mjerenja voda te prema dostavljenim obrascima izvršavati u cjelosti i u propisanim rokovima obavezu plaćanja vodnih naknada.
 4. U periodu važenja ove dozvole, Korisnik je dužan provoditi sve mjere i aktivnosti propisane istom.
 5. U slučaju izvanrednih situacija, havarijskih onečišćenja i drugih sličnih okolnosti, čime bi bio ugrožen kvalitet podzemnih i površinskih voda, korisnik objekta obavezan je izvijestiti nadležne organe i izvršiti izvanredna postupanja po nalogu nadležnih organa, te o vlastitom trošku uzroke štete otkloniti, a nastale štete nadoknaditi.
 6. Ukoliko usljed štetnog djelovanja voda nastalog zbog neizgrađenosti ili nedovoljne osposobljenosti (zaštitnih) vodnih objekata dođe do nastanka štete na predmetnom objektu obuhvaćenim ovom vodnom dozvolom, korisnik zaštitnih vodnih objekata nije odgovoran za nastale štete.
 7. Ukoliko radom predmetnog objekta dođe do šteta ma kakvog karaktera, korisnik vodne dozvole je dužan uzroke nastalih šteta otkloniti, a nastale štete trećim licima nadoknaditi.
 8. Prava stečena po ovoj dozvoli ne mogu se prenositi na treća lica, a ista prestaju u skladu sa odredbama Zakona o vodama.
 9. U ovoj upravnoj stvari plaćene su sve upravne pristojbe.
 10. Ova vodna dozvola, shodno članu 117. stav (1) i 129. Zakona o vodama se daje sa rokom važenja od 1 (jedne) godine od dana pravosnažnosti ovog rješenja
 11. Prije isteka važnosti ove dozvole Korisnik je dužan da podnese zahtjev za izdavanje nove vodne dozvole.
 12. Ovo rješenje o vodnoj dozvoli može se izmjeniti ukoliko za to nastupe razlozi utvrđeni u članu 130. stav (1) tačka 1., 2., 3. ili 4. Zakona o vodama, a zainteresirane stranke podnesu argumentiran zahtjev za izmjenu ovog vodnog akta.

O b r a z l o ž e n j e

Pravno lice «MODERNIZACIJA» d.o.o., dana 08.07.2021., podnijelo je zahtjev za izdavanje vodne dozvole za ispuštanje oborinskih onečišćenih i tehnoloških otpadnih voda u prirodni recipijent sa lokacije objekta za otkup i skladištenje sekundarnih sirovina u Lukavcu, ulica Tuzlanskog odreda 113, izgrađenog na zemljištu označenom kao k.č. broj 2813/1 K.O. Lukavac, općina Lukavac.

Dopisom broj: UP-I/25-3-40-304-2/21 od 12.07.2021. od Investitora je, u skladu sa članom 12. i članom 19. stav (2) Pravilnika o sadržaju, obliku, uslovima, načinu izdavanja i čuvanja vodnih akata («Službene novine Federacije BiH», broj 31/15, 55/19 i 41/20), traženo da dopuni dokumentaciju, što je i urađeno u ostavljenom roku.

U provedenom postupku dostavljena je i pregledana sljedeća dokumentacija:

- Ovjerena kopija Rješenja o izmjenama podataka broj: 032-0-Reg-21-000170 od 12.02.2021. izdatog od Općinskog suda u Tuzli,
- Ovjerena kopija Uvjerjenja o registraciji poreznog obveznika (Podružnica Lukavac) izdatog od Porezne uprave FBiH-Kantonalni porezni ured Tuzla od 21.04.2021.,
- Dokaz o uplaćenju upravnoj i administrativnoj taksi,
- Ovjerena kopija Ugovora o zakupu zaključenog dana 26.01.2021. sa JP «ŽELJEZNICE FEDERACIJE BOSNE I HERCEGOVINE» d.o.o. Sarajevo,
- Punomoć za podnosioca zahtjeva od 05.07.2021.
- Kopija katastarskog plana UR broj: 06-26-3-2344/2021-3 od 28.06.2021. izdatog od Službe za geodetske i imovinsko-pravne poslove Općine Lukavac,
- Kopija Odgovora po zahtjevu za izdavanje potvrde broj: 05-10-2848/21 od 08.09.2021. izdatog od JP «RAD» d.o.o. Lukavac,
- Kopija Rješenja o saglasnosti za izvoz opasnog otpada (olovne baterije) broj: UPI 07/1-02-19-8-40/21-1 AK od 08.06.2021. izdatog od Federalnog Ministarstva okoliša i turizma,
- Kopija Ugovora o preuzimanju, skladištenju i zbrinjavanju opasnog otpada (zbrinjavanje rabljenog ulja, zbrinjavanje uljnih filtera i mulj i zauljena voda iz separatora) zaključen dana 11.08.2021. sa «KEMOKOP» d.o.o. Tuzla.

Nakon izvršenog uvida u dostavljeni zahtjev i priloženu dokumentaciju utvrđeno je da su uz zahtjev dostavljeni potrebni prilozi, te je ovaj organ u skladu sa odredbama Zakona o upravnom postupku pokrenuo postupak u ovoj upravnoj stvari i u skladu sa članom 12. stav (5) i (6) Pravilnika o sadržaju, obliku i uvjetima i načinu izdavanja i čuvanja vodnih akata («Službene novine Federacije BiH», broj: 31/15, 55/19 i 41/20), izvršen je obilazak predmetnog objekta i tom prilikom je sačinjen Zapisnik o uviđaju broj: UP-I/25-3-40-304-5/21 od 02.09.2021. godine.

Na osnovu dostavljene dokumentacije i izvršenog uviđaja na licu mjesta utvrđeno je sljedeće:

- Objekat za otkup i skladištenje sekundarnih sirovina je izgrađen u ulici Tuzlanskog odreda 113, na prostoru teretne željezničke stanice u Lukavcu. Objekat je u zakupu. Na lokaciji se nalaze: 2 kontejnera za smještaj administracije i radnika, nadstrešnica za obojene metale, vanjski manipulativni i radni plato sa kolskom vagonom, separator masti i ulja.
- Onečišćene vode sa uređenog manipulativnog i radnog prostora se prikupljaju putem rigola u slivnik te odvođe na tretman u separator masti i ulja. Preliv iz separatora je u gradsku kanalizaciju kojom upravlja JP «RAD» d.o.o. Lukavac.
- Investitor ne posjeduje projektnu dokumentaciju za predmetni objekat.
- Izdvojene sekundarne sirovine se transportuju željeznicom na daljnju preradu.

Na osnovu dostavljene dokumentacije i uviđaja izvršenog na predmetnoj lokaciji, a u svrhu smanjenja negativnih uticaja predmetnog objekta na stanje voda i vodni režim, podnosiocu zahtjeva su ovom vodnom dozvolom propisani uslovi u skladu sa odredbama članova 53. i 116. Zakona o vodama, člana 12. Pravilnika o sadržaju, obliku, uvjetima načinu izdavanja i čuvanja vodnih akata i odredbama člana 3. tačke s) i cc) i člana 14. i 15. Uredbe o uslovima ispuštanja otpadnih voda u okoliš i sisteme javne kanalizacije.

Tačka 3. dispozitiva rješenja je propisana u skladu sa tačkama 12. i 35. Pravilnika o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte i posebnih vodnih naknada („Službene novine Federacije BiH“, broj 92/07, 46/09, 79/11 i 88/12) i Odlukom o visini posebnih vodnih naknada („Službene novine Federacije BiH“, broj 46/07).

Na osnovu provedenog postupka konstatuje se da je podnosilac zahtjeva «MODERNIZACIJA» d.o.o. Gradačac, ispunio minimum uslova za izdavanje vodne dozvole za ispuštanje oborinskih onečišćenih i tehnoloških otpadnih voda u prirodni recipijent, te je riješeno kao u dispozitivu ovog Rješenja.

Podnosilac zahtjeva je uplatio i posebne troškove shodno Zaključku ove Agencije, broj: UP-I/25-3-40-303-4/21 od 13.08.2021.

Podnosilac zahtjeva je uplatio upravnu i administrativnu taksu u iznosu od 70 plus 3 KM u skladu sa Zakonom o izmjenama i dopunama zakona o federalnim upravnim taksama i tarifi federalnih upravnih taksi («Službene novine Federacije BiH», broj 06/98, 8/00, 45/10 i 43/13).


Uputa o pravnom lijeku:

Protiv ovog rješenja može se uložiti žalba Federalnom ministarstvu poljoprivrede, vodoprivrede i šumarstva u roku od petnaest dana od dana prijema Rješenja.

Žalba se predaje ovom organu neposredno ili preporučeno poštom. Žalba se taksira sa 15 KM administrativne takse prema tarifnom broju 3. Tarife federalnih administrativnih taksi.

Obrađivač akta: Sanja Miličić, građ.ing

Po ovlaštenju:
Rukovodilac sektora za izdavanje vodnih akata



Hana Alšehović, dipl.inž.građ.

Dostaviti:

- «MODERNIZACIJA» d.o.o.
Sarajevska bb, 76250 Gradačac
- AVP Sava, ISV-vodna knjiga
 - sektor 50
 - sektor 40 – arhiva
 - oglasna ploča – AVP Sava